

**AWIG AWIG
DESA ADAT APIT YEH**



**DESA ADAT APIT YEH
KECAMATAN SELEMADEG TIMUR
KABUPATEN TABANAN**

BANTANG AWIG-AWIG DESA ADAT APIT YEH

	Kaca
MURDDHA CITTA	1
PRATHAMAS SARGAH ARAN LAN WEWIDANGAN DESA	1
DWITTIYAS SARGAH PATITIS LAN PAMIKUKUH	2
TRTIYAS SARGAH SUKERTAN TATA PAKRAMAN	2
Palet 1 Indik Krama	2
Palet 2 Indik Prajuru lan Dulun Desa	4
Palet 3 Indik kulkul	6
Palet 4 Indik Paruman	7
Palet 5 Indik Druwen Desa	8
Palet 5 Sukerta Pamitegep	9
Kaping 1 Karang, Tegal, lan Carik	9
Kaping 2 Pepayonan	10
Kaping 3 Wewangunan	10
Kaping 4 Wewalungan	11
Kaping 5 Bhaya	11
Kaping 6 Panyanggran Krama Banjar	12
CATURTHAS SARGAH SUKERTAN TATA AGAMA	12
Palet 1 Indik Dewa Yajnya	12
Palet 2 Indik Resi Yajnya	15
Palet 3 Indik Pitra Yajnya	15
Palet 4 Indik Manusa Yajnya	18
Palet 5 Indik Bhuta Yajnya	18
PANCAMAS SARGAH SUKERTAN TATA PAWONGAN	19
Palet 1 Indik Pawiwahan	19
Palet 2 Indik Nyapihan	20
Palet 3 Indik Sentana	20
Palet 4 Indik Warisan	20
SASTHAS SARGAH WICARA LAN PAMIDANDA	21
Palet 1 Indik Wicara	21
Palet 2 Indik Pamidanda	21
SAPTAMAS SARGAH NGUWAH-UWUHIN AWIG-AWIG	22
ASTAMAS SARGAH S A M A P T A.....	23
LEPIHAN I : TETNASAN NYASA LAN SASANTI	25
LEPIHAN II : PANITIA PERUMUS LAN PANYURATAN AWIG-AWIG	26

**MURDDHA CITTA
OM AWIGHNAM ASTU NAMO SIDDHAM**

Sembah bakti miwah pangastawan titiang majeng ring paduka Bhatara-Bhatari sesuwunan titiang sami, riantukan wantah malarapan panghyangning kalih paswecan Ida Sang Hyang Widhi Wasa asung kertawaranugraha nyresti jagat jangkep rawuhing sadagingnya sami, mawinan wenten kahuripan sekala niskala ring Bhuwana Agung miwah ring Bhuwana Alit. Manut dresta, Desane kamanggehang dados pasayuban Krama Desa rawuhing kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Desane taler kamanggehang pinaka pawakan bhawa mahurip, sane kacirenin antuk wentene pakilit Tri Hita Karana sane nenten dados pasahang, luwire :

- ha. Parhyangan, inggih punika : sahanan parhyangan panyiwian Desa genah ngarcana bhawan Ida Sang Hyang Parama Wisesa, pinaka jiwaan Desane;
- na. Pawongan, inggih punika : gebogan Krama rawuhing warga Desa maka sami pinaka bayu pramanan Desane, mawinan Desane prasida maolah prawreti;
- ca. Palemahan, inggih punika : sahananing pakarangan ,tegal,carik miwah setra sakekuwuban wewidangan Desa Adat puniki, pinaka sthulan Desane.

Adung patemoning Bhuwana Agung ring Bhuwana Alit, maka larapan ngupadi santa jagaddhita, punika sinanggeh murdhaning prayojana pangriptaning awig-awig iki, rikala paseban mami Krama Desa Adat Apit Yeh, pinaka sepat siku-siku pamatut miwah pamutus, wastu kasidan prayojanan mami kabeh, prasama angidep muwah amagehaken linging awig-awig, kadi ring sor iki.

PRATHAMAS SARGAH

ARAN LAN WEWIDANGAN DESA.

Pawos 1

- (1) Desa Adat puniki, mawasta Desa Adat Apit Yeh.
- (2) Jebar kekuwub wewidangannya mawates nyatur desa, inggih punika :
 - ha. Sisi wetan : Tukad Lambuk;
 - na. Sisi kidul : Desa Adat Bangkiang Sidem;
 - ca. Sisi kulon : Tukad Bunuhan;
 - ra. Sisi lor : Desa Adat Kemetug.
- (3) Jebar kekuwub wewidangan sane kawengku antuk wates-wates inucap, kirang langkung, wenten : 150,00 Ha.
- (4) Sane kamanggehang ngranjing dados kekuwub wewidangan Desa Adat puniki,manut dresta, luwire :
 - ha. Pupulan karang paumahan sane sinanggeh Palemahan Desa Pakraman;
 - na. Setra, carik miwah tegal sane wenten ring kekuwub wewidangan Desa Adat puniki sajabaning Palemahan Desa Pakraman, manggeh ngranjing dados Telajakan Desa Adat Apit Yeh.

- (5) Desa Adat puniki, kaepah dados kalih Banjar/Tempekan, luwire :
ha. Banjar/Tempekan Dajan Telabah;
na. Banjar/Tempekan Delod Telabah.
- (6) Awig-awig, Pararem miwah sahanan Pasuaran Desa, manggeh kajejerang ring jebar kekuwub wewidangan Desa Adat puniki sami.

DWITIYAS SARGAH

PATITIS LAN PAMIKUKUH

Pawos 2

Desa Adat Apit Yeh, ngamanggehang pamikukuh, minakadi :

- (1) Pancasila.
- (2) Undang-Undang Dasar 1945, pamekas pasal 18.
- (3) Tri Hita Karana, manut sadacara Agama Hindu.

Pawos 3

Luwir Patitis Desa Adat Apit Yeh :

- (1) Mikukuhin miwah ngrajegang Sang Hyang Agama.
- (2) Nginggilang tata prawretine maagama.
- (3) Ngrajegang kasukertan Desa saha Pawongannya sekala lan niskala.

TRTIYAS SARGAH

SUKERTAN TATA PAKRAMAN

Palet 1

Indik Krama

Pawos 4

- (1) Sahananing sang jenek mapaumahan ring wewengkon wewidangan Desa Adat Apit Yeh, sinanggeh warga Desa Adat Apit Yeh.
- (2) Warga Desa inucap ring ajeng, linggihnyane wenten 2 (kalih) soroh :
ha. Warga Desa sane maagama Hindu tur sareng nyungkemin Kahyangan Desa Adat Apit Yeh, sinanggeh Krama Desa Adat Apit Yeh.
na. Sajaba punika, sinanggeh Krama Tamiu, sane kasulurang manut Pararem.

Pawos 5

Dasar Pakraman :

- (1) Sahanan Warga Desa sane sampun marabian, patut ngawit dados Krama Desa.

- (2) Satunggil Krama, manut karendahan kulawargannya, patut keni sinalih tunggil ayah-ayah :
 - ha. Ayahan Ngarep ;
 - na. Ayahan Balu;
- (3) Sesengker ngawit tedun ngayah :
 - ha. Marep ring Krama Desa sane mawit saking pawiwahan, tigang sasih saking puput makala-kalaan;
 - na. Marep ring Krama Desa sane mawit saking ngarangin, kasulurang manut Pararem.
- (4) Krama Desa sane wenang nyada yan sampun kapastika, luwire :
 - ha. sungkan tahunan;
 - na. yan sampun maderbe pangentos utawi panyeladii;
 - ca. risampun mayusa 70 warsa manut kawentenan.
- (5) Sang saking sewosan desa yan sareng tedun makrama desa ring Desa Adat Apit Yeh, patut keni batu-batu utawi pamogpog, sane agengnya kasulurang manut Pararem.
- (6) Yening wenten krama saking sewosan desa sareng ngranjing makrama desa ring Desa Adat Apit Yeh, patut kadulurin surat katerangan sane jangkep.

Pawos 6

Wusan dados Krama Desa, luwire :

- (1) Sangkaning :
 - ha. seda;
 - na. pinunas ngraga, menawi magingsir linggih saking wewengkon Desa Adat Apit Yeh;
 - ca. kanorayang, malantaran piwal ring daging awig-awig miwah Pararem Krama Desa, utawi tan satinut ring pituduh Prajuru sajeroning indik nyupat sikian, minakadi nenten prasida ngesehin prawreti ;
 - ra. Tata-titine nitenin wusan dados Krama Desa inucap ring ajeng, kasulurang manut Pararem
- (2) Sang wusan dados Krama Desa tan polih pahpahan druwen Desa, sajawaning pahpahan sane mawit saking utsahan Banjar, miwah tan polih pasayuban malih sajeroning ala ayu.

Pawos 7

Sahanan Krama Desa, patut keni tetegenan utawi ayah-ayah, luwire :

- (1) Ayahan Ngarep, mapiteges paturunan miwah ayahan mamungkul saking Krama Ngarep.
- (2) Ayahan Balu, luwire :
 - ha. Balu Remban, sane pianaknyane kantung alit-alit, punika keni ayahan balu remban manut Pararem.
 - na. Balu Ngelintik, keni ayah-ayah balu manut balunnyane, yan lanang keni ayahan lanang, yan istri keni ayahan istri.

- (3) Ritatkala ngardi wewangunan kabuatan Desa Adat, Kramane, sajaba keni ayahan manut pawos 7, taler keni paturunan sakadi ring sor :
- ha. Paturunan samawibhaga, manut Pararem;
 - na. Dana Punia , manut kalascaryan sang madana punia.
- (4) Krama Desa, kadadosang :
- ha. Mapuankid utawi tan tedun ngayah/parum :
 - 1). Rikala mapawangunan, nangun yajnya, kaluwasan masengker dewasa ;
 - 2). keni dedawuhan saking Guru Wisesa ;
 - 3). kapialang, luwire : sungkan, matepetin, kalayusekaran, lan sakancan punika.
 - na. Dados ngwakilang ring jadma tiosan,sane sampun menek daa/truna.
 - ca. Dados mogpog utawi numbas ayahan, prade :
 - 1). dados Pegawai Negeri utawi Pegawai Perusahaan Swasta;
 - 2). magenah ring desa sewosan malantaran ngrereh pakaryan.
 - ra. Dados nyeladii utawi nyuksukin Krama Ngarep yan sampun mayusa 17 warsa.

Pawos 8

Kapatutan Krama Tamiu :

- (1) Krama Tamiu, patut madana punia ring Desa/Banjar, manut Pararem.
- (2) Krama Tamiu, patut polih pasayuban marupa pitulung rikenjekan katiben pancabhaya.

Pawos 9

Paturunan miwah Leluputan :

- (1) Paturunan utawi peson-peson sajeroning ngulati kasukertan Desa Adat/Banjar, kapitegenang ring Krama Desa/Banjar.
- (2) Desa/Banjare,maweh leluputan ayah-ayah miwah peson-peson ring sang inggiling linggih miwah sang kawelasaran.
- (3) Sor singgih leluputan miwah bacakan sang polih leluputan, kaunggulan jeroning Pararem.
- (4) Sajawaning Prajuru Desa/Banjar, sane taler pastika polih leluputan, luwire :
 - ha. para sadhaka, minakadi Pamangku Kahyangan/Panyiwian Desa, lan panyada;
 - na. para serati lan sutri;
 - ca. sang sungkan tahunan;
 - ra. wong cedangga bangat;
 - ka. wong ubuh meme bapa, jantos mayusa pitulas warsa.

Palet 2

Indik Prajuru lan Dulun Desa

Pawos 10


- (1) Desa Adat Apit Yeh, kaenter antuk Prajuru Desa Adat, kamanggala antuk Bendesa Adat.
- (2) Banjar, kaenter antuk Prajuru Banjar, kamanggala antuk Kelihan Adat.
- (3) Prajuru Desa Adat/Banjar, patut :
 - ha. mawit saking Krama Ngarep;
 - na. kaadegang Prajuru malantaran antuk pamilihan jeroning Paruman Krama Desa/Banjar, nyabran limang warsa, sajawaning wenten pariindikan tiyos, tur sang sampun puputing panumaya, kengin kapilih malih;
 - ca. maduluran atur piuning ring Pura Desa.

Pawos 11

- (1) Bendesa Adat, karombo antuk :
 - ha. Panyade, pinaka wakil Bendesa Adat;
 - na. Panyarikan, pinaka Juru Surat;
 - ca. Patengen, pinaka Pangemong Druwen Desa;
 - ra. Kasinoman, pinaka Jurun Gumencang.
- (2) Sajeroning ngenterang kasukertan kaniskala, Bendesa Adat, patut misinggihang Pamangku Kahyangan Desa.
- (3) Prajuru Desa taler ngadegang Dulun Desa utawi Panglingsir, sane sianggeh Kerta Desa, sane mawit saking Prajuru sane sampun piputing panumaya, sang wikan ring adat miwah agama, Kepala Desa miwah sane lianan, sane kasulurang manut Pararem.

Pawos 12


- (1) Swadharmaning Bendesa Adat, luwire :
 - ha. Ngenterang paruman-paruman Desa/Banjar.
 - na. Ngenterang panglaksanaan sadaging awig-awig miwah pamutus Krama Desa/Banjar, sane sinanggeh Pararem.
 - ca. Ngraksa miwah nudonang tata-titine migunayang sarajabrana druwen Desa.
 - ra. Nuntun saha ngenterang Krama desa rawuhing Warga Desa sami, ngupadi kasukertan sekala lan niskala.
 - ka. Nuntun saha nyaksi upacara sangskaraning kahuripan sane mabuat, minakadi sane ngilitang sulur pakulawargan.
 - da. Nuntun saha ngenterang Warga Desa nginggilang Sang Hyang Agama, kasucian Kahyangan, kasucian Palemahan, kasucian Pawongan, miwah tata-titine migunayang setra.
 - ta. Mawosin miwah niwakang pamutus marep ring wicaran Warga Desa.
 - sa. Ngwakilin Desa/Banjar, matemuang bebawos ring sapisira ugi.
 - wa. Lan sane sewosan sane wenten pakilitnya ring Desa/Banjar.
- (2) Tata-titine nglaksanayang swadharma inucap ring ajeng, tan maren patut satinut ring daging awig-awig, pararem, dresta miwah pamutus Paruman Krama Desa/Banjar.

- 
- (3) Panglaksanane inucap ring ajeng patut kasiarang ring Paruman Krama Desa/Banjar, kapungkuripun.
 - (4) Sumakuta utawi sumanggup natak pamutus Paruman Krama Desa/Banjar, ngeninin swadharman sowang-sowang Prajuru.

Pawos 13

Patias utawi olih-olihan Prajuru Desa Adat, luwire :
ha. luput reramon utawi peson-peson;
na. luput paturunan marep ring kabuatan Desa Desa Adat;
ca. polih tanding tengah;
ra. polih pah-pahan upon-upon palaba pura druwen Desa.
ka. patias sewosan manut Pararem.


Pawos 14

- 
- (1) Prajuru Desa, kapilih nyabran limang warsa, ngawit saking padiwasane kaadegang Prajuru.
 - (2) Prajuru Desa sane swadharmanya sampun puputing senger, kengin kapilih malih.
 - (3) Pariindikane ngadegang Prajuru Desa sakaluwire, kapastikayang malarapan Paruman Krama Desa tur kaingkupin antuk Krama.
 - (4) Wusan dados Prajuru Desa, sangkaning :
ha. lina;
na. pinunas ngraga malantaran jalaran sane pastika;
ca. swadharmanya sampun puputing senger;
ra. kawusanang utawi kanorayang olih Krama Desa duaning iwang pamargi, menawi nilar sesana.
 - (5) Ngentosin, ngwusanang utawi nganorayang Prajuru Desa, patut kamargiang sajeroning Paruman Krama Desa, tur kaingkupin antuk Krama Desa.

Palet 3

Indik Kukul

Pawos 15

- 
- (1) Dudonan Kukul ring Desa Adat Apit Yeh, luwire :
ha. Kukul Desa;
na. Kukul Banjar;
na. Kukul Sekaa-sekaa.
 - (2) Kukul Desa/Banjar, kamanggehang pinaka piranti utawi sarana tengeran maka wangsit, ring wewengkon wewidangan Desa/Banjar.
 - (3) Tetepakan suaran Kukul manut dresta, tur anggah-ungguh tetepakanipun, kaunggahang jeroning Pararem.

Pawos 16

- (1) Kukul Desa/Banjare, tan wenang katepak yan tan sangkaning pituduh Prajuru, sajawaning tengeran kapancabhayan.
- (2) Sang nepak Kukul Desa/Banjar, tan sangkaning pituduh Prajuru, patut digelis atur supekta maka buatan panepake; yan piwal, sang mamurug wenang katibakin danda, manut Pararem.
- (3) Kukul Sekaa-sekaa miwah kukul pondokan-pondokan, tan kalugra nyawerin utawi matehin sukat miwah tetepakan Kukul Desa/Banjare; prade mamurug, sang mamurug taler wenang katibakin danda, manut Pararem.

Palet 4

Indik Paruman

Pawos 17

- (1) Dudonan Paruman ring Desa Adat Apit Yeh, luwire :
 - ha. Paruman Krāma Desa, kawentenang sanistannya apisan jeroning awarsa utawi manut kabuatan, sane karihinin antuk tetibak arah-arah.
 - na. Paruman Padgatakala, rehning wenten indik sane dahat mabuat sane pacang kabawosang, sane karihinin antuk tetibak arah-arah.
 - ca. Paruman Krama Banjar, kawentenang nyabran sasih, manut Pararem Krama Banjar.
 - ra. Paruman Prajuru/Dulun Desa, kawentenang manut kabuatan.
 - ka. Paruman Sekaa-sekaa, kawentenang, manut kabuatan.
- (2) Pamargin Paruman Krama Desa/Banjar, patut nganutin dudonan :
 - ha. Paruman wahu kengin kakawitin sasampune katedunin antuk pinih kedik kalih pah tiga lintang , saking sang patut ngamiletin, kamanggala antuk tengeran suaran kukul, mabusana adat Bali, tan kalugra makta gegawan sakaluwire, karihinin antuk ngarcana Bhagawan Panyarikan majalaran widhi widhana lan cane.
 - na. Maka pangawit, kalaksanayang panyacak pangesepe, karuntutin antuk nyacak dedosan, wahu kalanturang antuk Parum; sasampun parumane puput, patut kacacak malih, tur sane kasepe, sang ninggal paruman miwah sane nosa, wenang katibakin danda, sane ageng alitipun, kasulurang manut Pararem.
 - ca. Maka pamastika wahu kengin nyacak pangesepe, kasulurang manut Pararem.
 - ra. Sajeroning paruman tan kalugra ngwetuang wak ghora minakadi ngardi biota; sang mamurug, wenang keni pamidanda bea pacamil, sakadi dandaning anguman-uman ring paseban, sane kasulurang manut Pararem.
 - ka. Pamutus bebawos sane briuk sapanggul utawi ingkup, punika sane kaaptiang tur kamanggehang.
- (3) Prade daging peparumane nenten kaingkupin, Prajuru Desa/Banjar mangda ngilikang bebawos, saha pamutusnya mangda kararemin antuk Krama Desa/Banjar; bilih jantos ping tiga taler nenten prasida kaingkupin, Prajuru Desa/Banjar, dados nunas bawos

ring Kerta Desa; bilih pamutus Kerta Desa taler nenten kaingkupin, Prajuru Desa/Banjar, dados nunasang indike punika ring Guru Wisesa.

Pawos 18

- (1) Sajeroning Paruman Krama Desa, Bendesa Adat patut nyiarang pamargine ngenterang Desa, pamekas ngeninin indik :
 - ha. Munjuk lungsuring gebogan pakraman saha ayah-ayahnyane, minakadi sulur arthabrana druwen Desa.
 - na. Pangrencanan Prajuru, ngeninin utsahan Desane kapungkur.
- (2) Pamutus Paruman Krama Desa sane sinanggeh Pararem, kamanggehang maka pamitegep panglaksanaan awig-awig.

Pawos 19

- (1) Paruman Prajuru/Dulun Desa, kawenangang wantah ngrincikang pangrencana, marep ring utsahan desane kapungkur.
- (2) Paruman Prajuru Desa, tan kawenangang ngamedalang tetegenan ring Krama Desa, saderenge kaingkupin antuk Krama Desa.
- (3) Pamutus Paruman Prajuru/Dulun Desa, kengin ngwetuang pasuara manut daging pituduh sang ngawa rat, utawi ngonekang pamutus sane pecak sampun dados Pararem Krama Desa.

Palet 5

Indil Druwen Desa

Pawos 20

- (1) Sane kamanggehang dados druwen Desa Adat Apit Yeh :
 - ha. Kahyangan Desa, luwire :
 - 1). Kahyangan Tiga : Pura Desa, Pura Puseh, Pura Dalem.
 - 2). Kahyangan druwen Desa sewosan ring Kahyangan Tiga, minakadi : Mrajapati, Pura Pamaksan Desa, Pura Dukuh, Pura Kawitan Desa, Palinggih Pempatan, Palinggih Selip.
 - na. Bale Banjar, Selip.
 - ca. Setra : 0,20 Ha.
 - ra. Palaba Pura, marupa tegal 0,15 Ha..
 - ka. Niasa lan Sasanti.
 - da. Koperasi Simpan Pinjam. / Restribusi : € USD
 - ta. Lekita-lekita : pipil utawi sertipikat, Awig-awig, Pasuara, Pararem, Purana.
 - sa. Lelangwan, minakadi tetabuhan lan ilen-ilen druwen Desa, luwire :
 - 1). Gong abarung;
 - 2). Ilen-ilen wali ring pura, minakadi rejang lan pendet.
 - 3). Palawatan Ida Bhatara, marupa : Tapel Pangpang.
- (2) Olih-olihan Desa Adat Apit Yeh, mawit saking :

- ha. Upon-upon palaba pura;
 na. Paturunan saking Krama Desa;
 ca. Paica saking Guru Wisesa;
 ra. Dana punia tiyosan, sane patut;
 ka. Pah-pahan saking Selip, miwah Koperasi Simpan Pinjam.
- (3) Sanangken Paruman Krama desa, Bendesa Adat patut nyiarang munjuk lungsur upon-upon palaba pura lan sapanunggalannya, sane sinanggeh druwen Desa.
 - (4) Upon-upon palaba pura lan sapanunggalannya, kanggen prabea piodalan miwah wewangunan ring pura, taler prabea tiosan marep ring kabuatan Desa Adat.
 - (5) Sakaluwiring druwen Desa patut wenten lekitannya sane pastika.
 - (6) Tan kalugra ngadol utawi ngesahang druwen Desa, yan tan kacumponin antuk Krama desa sami.

Palet 6

Sukerta Pamitegep

Kaping 1

Karang, Tegal, lan Carik

Pawos 21

- (1) Krama Desa sane ngamong Karang Desa utawi karang paumahan ngraga, patut ngwatesin karangnya sowang-sowang antuk pagehan utawi turus minakadi tembok, mangda pakantenannya asri.
- (2) Watese sane mawasta gegaleng kaluan miwah gegaleng kateben mangda nganutin dresta, tur kakaryanin olih sang negen wates inucap.
- (3) Prade karasayang pagehan utawi turus inucap nglikadin, yan pada arsa panyandinge, watese kengin nganggen pinget utawi prachihna pal saking Agraria, sakewanten kasaksi antuk Prajuru Desa/Banjar.
- (4) Prade wenten karang kabebeng, mangda kautsahayang wenten pamesuannya sane pastika.

Pawos 22

- (1) Sinalih tunggil Krama Desa/Krama Banjar, nenten kalugra :
 ha. ngalah-alah margi, karang desa, tegal ayahan desa, tegal utawi carik krama lian, lan sakancan punika;
 na. ngalah-alah tegak kahyangan, setra, lan sakancan tegak sane sinanggeh suci.
- (2) Prade wenten mamurug kecape ring ajeng, sang mamurug, patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut karuntutin antuk dewa danda miwah artha danda, sane kasulurang manut Pararem.

Kaping 2

Pepayonan

Pawos 23

- (1) Ngawit nandur pepayonan minakadi tanem tuwuh, patut adepa agung ngajeroang saking wates; pepayonan minakadi tanem tuwuh sane jantos ngliwat wates, wenang kasepatgantungin.
- (2) Pepayonan sane ngungkulin mawastu mayanin ka pisaga, sang nruwenang pepayonan inucap patut kawara tur kairing mapiguman antuk sang rumasa katetehan, bilih-bilih sang nruwenang arsa ngrebah utawi notor wit pepayonane punika.
- (3) Pradene sampun kawara taler tan wenten utsahan sang nruwenang, sang rumasa katetehan, wenang masadok ring Prajuru, tur risampune kaparitas kandugi wenten lelugrahan Prajuru, wahu wit pepayonane punika kengin karebah, sakewanten panukun patin wit pepayonane punika patut katahur olih sang rumasa katetehan manut panglokikan sang nepasin, tur wit pepayonane sane karebah punika, kasukserah ring sang nruwenang.
- (4) Sang patut keni pamidanda panyangaskara saha prabea manut pararem, marep ring wewangunan sang karubuhan, luwire :
 - ha. sang nruwenang wit pepayonan sane sinanggeh mayanin, pradene pungkut tur ngrubuhin wewangunan krama tiosan;
 - na. sang notor, monggol utawi ngrebah taru, tur ngrubuhin wewangunan krama tiosan.
- (5) Krama Desa patut ngamanggehang kawredian tanem tuwuh sane ngawinang Desane asri tur lestari sane kawastanin Bhuta Hita sane matesges kalestarian lingkungan hidup.
- (6) Sinalih tunggil Krama sane pacang ngrebah pepayonan minakadi tanem tuwuh sane ngawinang Desane asri tur lestari, patut masadok ring Prajuru.

Kaping 3

Wewangunan

Pawos 24

- (1) Nyabran ngwangun, sowang-sowang krama patut :
 - ha. masadok ring Prajuru, pamekas marep ring wewangunan sane mapanyaitan minakadi menengin wates.
 - na. ngangge Asta Bhumi miwah gegulak Asta Kosali, sanistannya manut ring patitise ka niskala.
- (2) Prade wewangunane jantos nyayubin ka pisaga, bilih-bilih temboke ring telenging wates, risampune kawara tur kairing mapiguman taler nenten wenten utsahan sang nruwenang, kangkat kasadokang ring Prajuru; sasampune kaparitas tur wenten lelugrahan Prajuru, sang nruwenang wenang keni danda manut pararem, tur tembok inucap patut kagubar olih sang nruwenang, sanistannya mangda kakaryanang abangan.

Kaping 4 Wewalungan

Pawos 25

- (1) Sahanan warga desa sane miara wewalungan : bawi, banteng, lan sakancan punika, mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilih-bilih jantos ngranjing ngletehin kahyangan.
- (2) Prade wenten wewalungan sane malubar utawi ngeleb tur ngrusak karang utawi pabianan krama sewosan, risampune kawara taler nenten wenten utsahan sang nruwenang, yan wewalungan punika malih ngrusak karang utawi pabianan krama sewosan, wewalungan inucap kengin kataban, tur sang nruwenang wenang katibakin danda ngwaliang panukun wit tetanduran sane karusak, saha nahur panebas pepiaran tetaban, manut panglokikan Prajuru Desa Adat.
- (3) Prade wenten wewalungan ngranjing jantos ngletehin genah suci, minakadi kahyangan, pamarajan lan sakancan punika, risampune kaparitas antuk Prajuru, sang nruwenang wewalungan inucap wenang keni dewa danda lan artha danda, sape agung alitipun manut kecap sastra agama, sane kapikukuh antuk Krama Desa Adat.
- (4) Krama Desane patut nyerayanin wewalungan miwah sarwa prani, tan kapatutang mademang paksi, nuba ulam lan sakancan punika, pinaka sinalih tunggil utsahan Krama Desane ngardi Bhuta Hita.
- (5) Sang mamurug kecape ring ajeng, wenang keni danda manut Pararem.

Kaping 5

Bhaya

Pawos 26

- (1) Bacakan bhaya, luwire : jiwabhaya, arthabhaya, agnibhaya, toyabhaya, lindubhaya, lan sakancan punika, sane ketahipun kawastanin Pancabhaya.
- (2) Sinalih tunggil krama sane manggihin pracihna pastika wentene sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
- (3) Prade Desane kahanan jiwabhaya, Krama Desane patut ngaturang upacara pamahayun Desa manut kecap sastra agama, sane kapikukuh antuk Krama, tur sang ngwetuang jiwabhaya katur ring sang ngawawenang.
- (4) Sahanan Warga Desa Adat Bayan, tan kalugra : nyimpen, makta, ngadol, nglimbak-ang, miwah nunas narkoba, lan sakancan punika; sang mamurug wenang katibakin pamidanda manut Pararem, tur katurang ring ngawawenang.

Pawos 27

- (1) Sinalih tunggil Krama sane manggihin pracihna pastika wentene arthabhaya (kamalingan), patut digelis nepak kulkul tengeran pamitulung manut pawos 15 (4) utawi pawos 16 (1); sang kamalingan patut atur supeksa ring Prajuru; sang kacihnan ngamaling, katur ring sang ngawawenang, maweweh malih patut kenii dewa danda lan artha danda manut Pararem, yan ipun ngamaling barang druwen Desa sane sinangeh suci.
- (2) Sowang-sowang Krama desa tan kapatutang mapailon ring dusta; sang kacihnan mapailonan ring dusta patut katibakin danda kadi dandaning maling,sane kasulurang manut Pararem
- (3) Indik ngrekeh reramon minakadi daun kelapa, ron, miwah sane sewosan ring pabianan krama tiosan rikenjekan suwung, kasulurang manut Pararem.
- (4) Indik ngranjingin pakubon utawi pakarangan krama sewosan rikala suwung, mawastu raris sang maderbe pakubon utawi pakarangan kaicalan, kasulurang manut Pararem.
- (5) Indik ngranjingin pakubon utawi pakarangan krama sewosan rikala suwung riantukan wenten pisarat sane mabuat, minakadi mapangarah miwah kabuatan sane lianan, kasulurang manut Pararem.

Kaping 6

Panyanggran Krama Banjar

Pawos 28

- (1) Krama Banjar ring wewengkon Desa Adat Apit Yeh, patut sareng nyanggra karya suka-dukan sowang-sowang Krama Banjar.
- (2) Tetibak panyanggrane inucap ring ajeng, kasulurang manut Pararem.
- (3) Sowang-sowang Krama Banjar sane pacang nangun karya suka-duka sane mabuat, mangda masadok ring Prajuru.

CATURTHAS SARGAH

SUKERTAN TATA AGAMA

Palet 1

Indik Dewa Yajnya

Pawos 29

- (1) Kahyangan-kahyangan panyiwian Krama Desa Adat Bayan, luwire :
 ha. Kahyangan Tiga : Pura Desa/Baleagung, Pura Puseh, Pura Dalem.
 na. Kahyangan-kahyangan panyiwian Krama desa tiosan ring Kahyangan Tiga :
 Mrajapati, Pura Pamaksan, Pura Dukuh, Pura Kawitan, Palinggih Pempatan,
 Palinggih Selip.
- (2) Tegak piodalan ring sowang-sowang kahyangan inucap ring ajeng, kamanggehang

sakadi ring sor puniki :

- ha. Pura Desa/Baleagung ring rahina Buda, Umanis, wuku Perangbakat.
 - na. Pura Puseh ring rahina Buda, Umanis, wuku Perangbakat.
 - ca. Pura Dalem ring rahina Buda, Kliwon, wuku Gumbreg.
 - ra. Mrajapati, ring rahina Buda, Kliwon, wuku Gumbreg.
 - ka. Pura Pamaksan lan Kawitan, ring rahina Anggara Kasih, Tambir.
 - da. Pura Dukuh, ring rahina Buda, Umanis, wuku Perangbakat.
 - ta. Palinggih Pempatan lan Palinggih Selip, ring rahina Tumpek, Landep.
- (3) Pamargin pangacine ring sowang-sowang kahyang inucap ring ajeng, manut kecap sastra agama, saha kalaksanayang kanista, madhyama, utama, manut kawentenan krama sane kaingkupin jeroning Pararem.

Pawos 30

- (1) Ring sowang-sowang pura inucap ring ajeng, patut kaadegang Pamangku.
- (2) Pidabdabe ngadegang Pamangku, nganutin dudonan :
 - ha. ngwilang saking turunan utawi ngwaris;
 - na. malantaran nyanjan utawi nuhur ring pura sane karerehang Pamangku;
 - ca. malantaran kapilih antuk Krama Desa.
- (3) Sang tan wenang kaadegang dados Pamangku, luwire :
 - ha. cedangga, luwire : peceng, perot, cungh, lan sapanunggalannya;
 - na. sapisira ugi sane nenten kapatutang manut Pararem;
 - ca. nandang sakit ila, ayan, buduh miwah pinungkan sane tan keneng tinamben;
 - ra. sang maderbe parilaksana nenten becik.
- (4) Prabea Kapamangkuan :
 - ha. prabean upakara/upacara adiksa widhi utawi ngwintenang Pamangku, kamedalin miwah kalaksanayang antuk Krama Desa;
 - na. marep ring prabean pitra yajnya ring Pamangku, Panyade, yan seda riwekas, Krama Desane patut maweh dana punia atiwa-tiwa, manut Pararem.
- (5) Pamangku, patut ngamanggehang sesana miwah agem-ageman Pamangku.
- (6) Tiosan ring ngadegang Pamangku, Krama Desa Adat Bayan, taler ngadegang Jero Panglingsir, sane maderbe amongan muput yajnya rikala nenten prasida mendak Sri Empu; pidabdabe ngadegang Jero Panglingsir, kasulurang manut Pararem.

Pawos 31

Swadharmaning Pamangku, luwire :

- ha. ngenterang upacara piodalan ring kahyangan sane kaemponin utawi ring pakubon sowang-sowang krama;
- na. prade sinalih tunggil Pamangku Kahyangan Desane kapialang utawi cuntaka, kengin nyelang Pamangku Kahyangan Desa tiosan, utawi nuhur sang sulinggih, katitenin antuk Prajuru;
- ca. yan Pamangku kalayusekaran, wenang anglepas swadharma, kasulurang manut

Pararem.

- ra. yan Pamangku sampun tigang rahina ngayah ring pura sane kaemponin, kancit wenten kulawargannya kalayusekaran, Pamangku inucap tan keneng cuntaka, sakewanten nenten kengin budal salamin piodalan;
- ka. munggah tedun ring palinggih-palinggih Kahyangan Desa miwah ngiyasin pralingga- pralingga, manut pamastikan Prajuru.
- da. ngrajegang sesanan Pamangku.

Pawos 32

Patias utawi olih-olihan Pamangku, luwire :

- ha. panyolasan miwah sarin canang muput yajnya ring sowang-sowang pakubon krama;
- na. upon-upon palaba carik miwah tegal, manut Pararem;
- ca. luput pakaryan miwah reramon;
- ra. polih apahtigan sarin canang rikala wenten aci ring kahyangan sane kaemponin;
- ka. luput saluwiring prabean wewangunan ring kahyangan sane kaemponin.

Pawos 33

- (1) Pamangku kagentosin,riantukan :
 - ha. seda;
 - na. pinunas ngraga, menawi kageringan lan sapanunggalannya;
 - ca. kawusanang antuk Krama, riantukan nilar sesanan Pamangku;
- (2) Tatacarane ngadegang miwah ngentosin Pamangku, kasulurang manut Pararem.

Pawos 34

Indik Kasukertan Kahyangan, kadudonang sakadi ring sor puniki :

- (1) Sane nenten kalugra ka pura, luwire :
 - ha. Sang katiban cuntaka, minakadi sebel ngraga :
 - 1). sebel kandel ngrajaswala, salami dereng mabresih;
 - 2). sebel antuk ngembasang putra, salami 42 rahina, pateh sakadi sang karuron;
 - 3). sebel pangantenan, sadereng mabiakala utawi makala-kalaan;
 - 4).sebel riantukan kalayusekaran, jantos puputing sengker sane kaingkupin jeroning Pararem.
 - na. Makta sahanan bebaktan sane sinanggeh ngletehin, manut kecap sastra agama.
 - ca. Sato agung minakadi wewalungan suku pat, sajawaning rikala mapepada.
 - ra. Anak alit saderenge mayusa tigang sasih.
 - ka. Mabusana sane tan manut kadi tatacaraning ngranjing ka pura.
 - da. Sadereng polih wak-wakan utawi pituduh saking Prajuru Desa.
- (2) Tata busanane ngranjing ka pura, kasulurang manut Pararem.
- (3) Pratingkahe tan wenang ring pura, luwire :
 - ha. masumpah utawi macoran, sajawaning wit saking pituduh Prajur Desa;
 - na. ngamedalang wak parusia utawi wak capala;
 - ca. mabanyu, makoratan, masesenengan, makolem dados asiki lanang wadon,

- nyangsang busana;
ra. ngias raga minakadi menahang wastra, menahang pusungan lan sakancan punika, sajawaning sang sulinggih miwah pinandita;
- (4) Sewosan ring Pamangku tan kalugra munggah tedun ring palinggih-palinggih, sajawaning wit saking pituduh Prajuru Desa.
 - (5) Sang mamurug kecape ring ajeng, wenang keni dewa danda, manut pamutus Pararem.

Pawos 35

- (1) Yan wenten jadma karawuhan ring pura boya saking nyanjan tur ngawinang kramane biapara, wenang keni dewa danda lan artha danda, sane kasulurang manut Pararem.
- (2) Prade Kahyangan Desane kahanan durmanggala minakadi kapancabhayan, Pamangku patut digelis masadok ring Prajuru Desa.
- (3) Indik upakara/upacara pamahayun kadurmanggalan Kahyangan Desa, mapagamel kecap sastra agama, sane kasungkemin olih Krama Desa.

Palet 2

Indik Resi Yajnya Pawos 36

- (1) Sang pacang madeg sulinggih utawi madwijati patut masadok ring Prajuru miwah Parisada Hindu Dharma Indonesia.
- (2) Prajuru Desa patut ngawas lan nitenin tur wenang mialangin, prade kacihnan wenten indik sane tan manut kecap sastra agama, tur sareng nyaksi upacara padwijatiannya, saha nglantur nyiarang jeroning Paruman Krama Desa tegep rawuhing wates kawenangannya muput yajnya.
- (3) Krama Desa patut madana punia sapamadeg miwah ring panglepas Sang Sulinggih riwekas katuntun antuk Prajuru Desa.
- (4) Sang sulinggih wenang polih leluputan ayahan miwah peson-peson.

Pawos 37

- (1) Sajeroning muput yajnya, Sang Sulinggih patut ngutamayang muput yajnya ring wewengkon Desa Adat Apit Yeh, sasampunnya puput, wahu muput yajnya ring wewengkon Desa tiosan utawi kadura desa.
- (2) Krama Desane sami, patut sareng ngawas lan nitenin katuntun antuk Prajuru, mangda sahanan yajnya sane kalaksanayang olih sowang-sowang Krama Desa, kapuput olih Sulinggih utawi pinandita, manut kawenangannya sowang-sowang.

Palet 3

Indik Pitra Yajnya

Pawos 38

- (1) Desa Adat Apit Yeh, patut sareng nyanggra yan wenten sinalih tunggil krama sane nglaksanayang upacara Pitra Yajnya.
- (2) Tatacara panyanggrane inucap ring ajeng, kasulurang manut Pararem.
- (3) Dudonan pamargin Pitra Yajnya, luwire :
 - ha. majalaran mendem utawi ngeseng, maka cihna makingsan ring Prethiwi utawi makingsan ring Geni, pinaka dharana antos nuptupang prabea;
 - na. majalaran upacara pangabenan utawi palebon;
 - ca. riwusan ngaben, patut kalanturang malih antuk upacara mamukur tur karuntutin malih antuk nglinggihang Dewa Pitara.

Pawos 39

- (1) Sinalih tunggil krama sane kalayusekaran/atiwa-tiwa, mangda masadok ring Prajuru.
- (2) Swadharmaning Krama Banjar :
 - ha. Kelihan Banjar/Kelihan Adat patut maritatas sang kaduhkitan, napike pacang kapendem, makingsan ring Geni, utawi lantur kaabenang.
 - na. Prade kapendem, raris kawentenang panepak kulkul tengeran kalayusekaran.
 - ca. Panyanggran Krama Desa salanturnya manut sakadi sane sampun kaunggahang jeroning Pararem, jantos pependemane puput.
 - ra. Prade makingsan ring Geni, panyanggran Krama Desa salanturnya, manut kadi daging Pararem, jantos pamargin upacarane puput.
 - ka. Prade kaabenang, panyanggran Krama Desa salanturnya, manut kadi daging Pararem, jantos pamargin upacarane puput.
- (3) Tan kalugra nginepang bangbang.
- (4) Desane maweh galah ring sang kalayusekaran sajeroning pitung rahina kengin atiwa-tiwa sajawaning wenten kabuatan tios saking sang yajamana.
- (5) Larangan pependeman miwah palebon ring wewengkon Desa Adat Apit Yeh, kaunggahang jeroning Pararem.
- (6) Prade wenten kalayusekaran rikala wenten piodalan ring Kahyangan Desa, kengin mendem tan pasadok, tur patut ngrekeh galah mamargi rikala wengi.

Pawos 40

- (1) Desa Adat Apit Yeh, ngamanggehang indik cuntaka, mapagamel ring Pamutus Mahasabha Parisada Hindu Dharma Indonesia.
- (2) Tatacarane nyulurang kacuntakan, mapagamel ring kecap sastra agama, kaanutang ring drestan desa, sane kaingkupin jeroning Pararem.
- (3) Sinalih tunggil krama sane kahanan cuntaka, yan durung utas, tan kalugra nyarubin genah suci druwen Desa miwah druwen sowang-sowang krama.
- (4) Sang mamurug, patut keni dewa danda, manut Pararem.
- (5) Sengker utas cuntaka manut kawentenannya, kasulurang sakadi ring sor puniki :
 - ha. Kalayusekaran, cuntakannya kaanutang ring drestan desa miwah sastra dresta.

- na. Ngrajaswala, cuntakannya tigang rahina ngawit saking ngrajaswala, utawi salaming ngrajaswala.
- ca. Ngembasang putra, cuntakannya abulan pitung rahina ngawit saking putrane embas, jantos katiwakin upacara tutug kambuhan.
- ra. Karuron, cuntakannya abulan pitung rahina ngawit saking karuron, jantos katiwakin tirtha pamrayascita.
- ka. Pawiwahan, cuntakannya jantos sampun makala-kalaan.
- da. Gamia gamana, cuntakannya jantos sampun kapalasang, karuntutin antuk mrayascita sikian, Desa Adat miwah Kahyangan Desa.
- ta. Salah timpal, cuntakannya kapuputang manut kecap sastra agama miwah drestan Desa.
- sa. Anak istri mobot malantaran lokika sanggraha kandugi nenten katiwakin upakara/upacara pabiakawonan, cuntakannya jantos katiwakin upakara/upacara pabiakawonan.
- wa. Anak istri ngembasang putra malantaran lokika sanggraha kandugi pecak nenten katiwakin upakara/upacara pabiakawonan miwah widhi widhana, cuntakannya jantos wenten meras anake alit, karuntutin antuk upakara/upacara manut kecap sastra agama.
- la. Sad atatayi, cuntakannya jantos sampun mrayascita sikian miwah ngehehin prawreti.
- ma. Mamitra ngalang, cuntakannya jantos katiwakin upacara pabiakawonan.

(6) Cuntaka kalayusekaran/kapademan :

ha. Kapendem, cuntakannya :

- 1). Cuntaka ka Banjar, laminipun tigang rahina ngawit saking wusan mendem, jantos sampun maprayascita (masepuh).
- 2). Kulawargannya sajeroning pakarangan, manut dresta.

na. Kaabenang, cuntakannya :

- 1). Cuntaka ka Banjar, manut dresta sane kapikukuh antuk Pararem.
- 2). Cuntakan sang nyambut karya Pitra Yajnya, manut dresta sane kapikukuh antuk Pararem.

(8) Sang katiben cuntaka, luwire :

ha. Kalayusekaran, sane cuntaka :

- 1). sang kalayusekaran;
- 2). kulawargannya;
- 3). bebanjarannya.

na. Ngrajaswala, sane cuntaka : sang ngrajaswala punika.

ca. Ngembasang putra, sane cuntaka : yayah renan sang wahu embas.

ra. Pawiwahan, sane cuntaka : sang mawiwaha utawi dampati lanang istri.

ka. Karuron, sane cuntaka : sang karuron rawuhing lanangnyane.

da. Gamia gamana, sane cuntaka :

- 1). sang nglaksanayang gamia gamana;
- 2). Desa Adatnyane.

ta. Salah timpal, sane cuntaka :

- 1). sang nglaksanayang salah timpal;
- 2). Desa Adatnyane.

- sa. Anak istri mobot malantaran lokika sanggraha, kandugi nenten katiwakin upakara/upacara pabiakawonan,sane cuntaka : anake istri sane mobot punika.
- wa. Anak istri ngembasang putrsa malantaran lokika sanggraha, kandugi pecak nenten katiwakin ipakara/upacara pabiakawonan miwah widhi widhana,sane cuntaka :
- 1). sang ngembasang putra;
 - 2). putrane sane kaembasang.
- la. Mamitra ngalang, sane cuntaka : sang nglaksanayang mamitra ngalang punika.
- ma. Sad atatayi, sane cuntaka : sang nglaksanayang sad atatayi punika.
- (9) Sang tan keneng cuntaka, luwire :
- ha. Sang Sulinggih;
- na. Pamangku Kahyangan Tiga, rikala piodalan tur sampun ngayah tigang rahina ring pura sane kaemponin.

Pawos 41

- (1) Pamargin atiwa-tiwa utawi pangabenan kalaksanayang mapagamel kecap sastra agama miwah dresta.
- (2) Peputusan pangabenan, kasulurang manut Pararem.
- (3) Pangingune ring Krama Banjar, kasulurang manut Pararem.

Palet 4 Indik Manusa Yajnya

Pawos 42

- (1) Krama Desa minakadi Krama Banjar, patut sareng nyanggra miwah nitenin yan wenten sinalih tunggil krama nglaksanayang upacara Manusa Yajnya sane mabuat.
- (2) Tatacara panyanggrane inucap ring ajeng, kasulurang manut Pararem.
- (3) Sang pacang nglaksanayang upacara Manusa Yajnya sane mabuat, mangda masadok ring Prajuru.
- (4) Manusa Yajnya, inggih punika : upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, jantos kalayusekaran ri wekas.
- (5) Upacara-upacara inucap ring ajeng, kamargiang : kanista, madhyama, utama, manut kecap sastra agama miwah dresta.

Palet 5 Indik Bhuta Yajnya

Pawos 43

- (1) Desa Adat Apit Yeh, patut nyanggra pamargin Bhuta Yajnya, marep ring

- kabuatan Desa Adat Apit Yeh.
- (2) Pidabdab pamargin Bhuta Yajnya inucap ring ajeng, mapagamel kecap sastra agama, kaanutang ring drestan Desa, sane kapikukuh antuk Pararem.
 - (3) Krama Desa, patut sareng nyanggra yan wenten sinalih tunggil Krama Desa, sane nglaksanayang upacara Bhuta Yajnya sane mabuat.
 - (3) Sang pacang nglaksanayang upacara Bhuta Yajnya sane mabuat, mangda masadok ring Prajuru.

Pawos 44

- (1) Bhuta Yajnya marep ring kabuatan Desa Adat minakadi carun sasih miwah sane lianan, kasulurang manut Pararem.
- (2) Indik pamargin palelastian utawi makiyis, kasulurang manut Pararem.
- (3) Nangken warsa, rikalaning Tilem Sasih Kasanga, Krama Desa Adat Bayan, patut nglaksanayang Tawur Kasanga, kalanturang antuk pangrupukan, pinaka cihna nyanggra pangrawuh Nawa Saka Warsa (Tahun Baru Saka) ring pananggal apisan Sasih Kadasa, sane kawastanin Nyepi.
- (4) Rikalaning Nyepi, sowang-sowang Krama Desa patut ngamargiang Catur Brata Panyepian, inggih punika :
 - ha. amati geni : tan kengin maapi-api;
 - na. amati karya : tan kengin nyambut karya;
 - ca. amati lelangwan : tan kengin maoneng-onengan, ngwijilang suara ghora, nabuh gegambelan, lan sakancan punika;
 - ra. amati lelungan : tan kengin malelungayan mrika-mriki.
- (5) Catur Brata Panyepian punika kamargiang saking semeng jantos benjangne ngedas rahina.
- (6) Mangda pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidanda, sane kasulurang manut Pararem.
- (7) Benjangne ring pananggal ping kalih Sasih Kadasa, kawastanin Ngembak Geni, sowang-sowang krama patut saling ngaksamayang, sane ketah kawastanin Dharma Santi.

PANCAMAS SARGAH

SUKERTAN TATA PAWONGAN

Palet 1

Indik Pawiwahan

Pawos 45

- (1) Krama Desa minakadi Krama Banjar, patut sareng nyanggra miwah nitenin yan wenten sinalih tunggil krama sane nglaksanayang upacara Pawiwahan.
- (2) Pamargin Pawiwahan, luwire :

- ha. malantaran pepadikan;
na. malantaran ngorod utawi marangkat (ngrangkat);
ca. malantaran nyentana utawi nyentana nyeburin.
- (3) Indik Pawiwahan, Desa Adat Apit Yeh, ngamanggehang Undang-Undang Nomor 1 Tahun 1974, miwah Peraturan Pemerintah Nomor 9 Tahun 1975, indik Pawiwahan.
 - (4) Tatacara panglaksanannya, mapagamel kecap sastra agama, kaanutang ring drestan Desa, sane kapikukuh jeroning Pararem.
 - (5) Sinalih tunggil krama sane pacang nglaksanayang upacara Pawiwahan, mangda masadok ring Prajuru.

Palet 2

Indik Nyapihan

Pawos 46

- (1) Prajuru Desa minakadi Prajuru Banjar, wenang sareng mawosin miwah nitenin, yan wenten sinalih tunggil krama sane mapikarsa pacang palas marabi, gumanti nenten kadurusan dados nyapihan.
- (2) Yan krama inucap kukuh ring pakarsannya, Desa Adat minakadi Krama Banjar, nenten sumakuta ring pamarginnya.
- (3) Saderenge pastika polih pamutus saking sang ngawawenang minakadi Sang Rumawos (Pengadilan Negeri), krama inucap manggeh keni tetegenan krama, sakadi nguni.

Palet 3

Indik Sentana

Pawos 47

- (1) Prajuru Desa minakadi Prajuru Banjar, wenang sareng mawosin miwah nitenin, yan wenten sinalih tunggil krama sane ngindikan sentana.
- (2) Indik sentana, Desa Adat Apit Yeh, ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan Desa, sane kapikukuh antuk Pararem.
- (3) Sang pacang ngrajegang sentana, mangda masadok ring Prajuru.

Palet 4

Indik Warisan

Pawos 48

- (1) Prajuru Desa minakadi Prajuru Banjar, wenang sareng mawosin miwah nitenin, yan wenten sinalih tunggil krama sane ngindikang warisan.
- (2) Indik Warisan, Desa Adat Apit Yeh, ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan Desa, sane kapikuh antuk Pararem.
- (3) Sang pacang ngindikang warisan, mangda masadok ring Prajuru.

**SASTHAS SARGAH
WICARA LAN PAMIDANDA**

Palet 1

Indik Wicara

Pawos 49

- (1) Sane wenang mawosin wicara ring wewengkon Desa Adat Bayan, inggih punika : Prajuru Desa maka miwah Dulun Desa sane kawastanin Kerta Desa.
- (2) Prade sang mawicara tan cumpu ring Pamutus Kerta Desa, kengin nunasang wicaranipun ring Sang Rumawos.
- (3) Sahanan sane mawit saking kacorahan sakaluwire, sane sinanggeh nungkasin daging Awig-awig, Pasuara miwah Pararem Kraña Desa, patut digelis kabawosin olih Prajuru, nenten nyantos pasadok malih.
- (4) Sajaba wicara sakadi ring ajeng, patut nyantosin pasadok sang nunas bawos.
- (5) Panepase mangda pastika nyantenang iwang patut malarapan Tripramana, inggih punika : saksi, likita, bukti, tur panepase tan maren nepek ring Catur Dresta.

Palet 2

Indik Pamidanda

Pawos 50

- (1) Desa/Banjare, wenang nibakang pamidanda ring warga Desa/Banjar sane sisip.
- (2) Tetibak pamidanda inucap ring ajeng, kalaksanayang olih Prajuru.
- (3) Bacakan pamidanda, luwire :
ha. ayahan panukun kasisipan;
na. artha danda saha panikelnya, miwah panikel paturunan,
ca. rerampagan;
ra. kanorayang;
ka. kawusanang Makrama Desa;
da. panyangaskara.
- (4) Pamidanda sane katiwakang, patut masor singgih, manut kasisipan.
- (5) Jinah utawi arthabrana pamidanda, ngranjing dades druwen Desa/Banjar.

Pawos 51

- (1) Krama sane langkungan ring tigang paruman nglantur nenten nahur paturunan miwah dedandan, wenang karampag.
- (2) Tetibak rerampagan, nganutin tatacara sakadi ring sor puniki :
 - ha. Kalaksanayang olih Prajuru, kasarengin antuk krama pinih akeh tigang diri, maka saksi.
 - na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangargannya manut ring utang sang karampag.
 - ca. Prajuru patu miteketang mangda barang-barang sane karampag punika digelis katebus masengker awuku, tur ring katus rahinane pacang kalelang utawi kaadol.
 - ra. Tan kengin ngrampag saluwiring barang sane patut inggilang manut kecap sastra agama, miwah mademang pangupajiwane sang karampag.

Pawos 52

- (1) Prade sang pacang karampag mialangin pamargin rerampagan inucap, mawastu sampun tan nganutin linging awig-awig, krama inucap wenang kanorayang.
- (2) Yan krama inucap manggeh piwal yadiastun sajeroning makudang-kudang paruman sampun kawehin patinget sakewanten manggeh piwal, tan wenten pamargi sewos, sawawaning krama inucap kawusanang Makrama Desa.
- (3) Rerampagan inucap ring ajeng kabawos buntas, risampun sang keni rerampagan punika :
 - ha. Nunas geng rena sinampura ring ajeng Krama Desa/Banjar, riantukan piwal ring pasubaya sane pecak sampun kararemin.
 - na. Nahur pangargan panguwak pasubaya sadaweg pacang karampag, kadulurin antuk prayascita.

SAPTAMAS SARGAH

NGUWAH-UWUHIN AWIG-AWIG

Pawos 53

- (1) Nguwah-uwuhin Awig-awig Desa puniki, wantah kengin kalaksanayang antuk Paruman Krama Desa.
- (2) Pakarsane nguwah-uwuhin punika, mangda mawit saking pakarsan Krama Desa, yadiastun kamedalang antuk sinaih tunggil Prajuru, utawi sinarengan.

Pawos 54

- (1) Sakaluwiring indik sane sampun kamargiang sadereng Awig-awig puniki kasurat, mangda kaanutang ring sadaging Awig-awig puniki.
- (2) Sakaluwir sane durung kasurat sajeroning Awig-awig puniki, menawi kangkat kanggen mitegepin awig-awig puniki, pacang kasurat jeroning Pararem.

ASTAMAS SARGAH

SAMAPTA


Pawos 55

- (1) Awig-awig puniki kawastanin Awig-awig Desa Adat Apit Yeh.
- (2) Awig-awig puniki kamargiang ngawit kaingkupin utawi kararemin.

Pawos 56

- (1) Awig-awig puniki kararemin duk rahina : Wrehaspati, Unianis, wuku Matal, pangelong ping 3 , Sasih Jyestha, Isaka Warsa 1923, tanggal 10 Mei 2001, magenah ring Bale Banjar Desa Adat Apit Yeh.
- (2) Awig-awig puniki kalinggatanin antuk Bendesa Adat miwah Kelihan Adat, kasaksinin antuk Kelian Dinas miwah Kepala Desa, kawikanin miwah kapikukuh olih sang ngawawenang manut kawenangannya sowang-sowang, tur kapikukuh antuk Murdhaning Pamikukuh : Bupati Tabanan.
- (3) Luwir sang nglinggatanin :
ha. Kapratama : Prajuru Desa Adat :

1) Bendesa Adat Apit Yeh,



ANAK AGUNG MADE SUBAGIA

2). Kelihan Adat Dajan Telabah,

3). Kelihan Adat Delod Telabah.



I WAYAN MENDER



I GUSTI KETUT WIDASTRA


na. Kaping kalih : Prajuru Desa Dinas maka saksi :

1) Kelihan Dinas Banjar Apit Yeh,



I KETUT SUKAWETA



2) Kepala Desa Gunung Salak.



A. A. NG. BUWANA YASA

ca. Kaping Tiga Kawikanin oleh :



1). Ketua PHDI Kecamatan Selemadeg, 2). Camat Selemadeg.



I NENGAH WIDEREDA
DRS. I.N. SAYUN

ra. Kaping Empat Kapikukuh oleh :

1). Ketua BPPLA Kabupaten Tabanan, 2). Ketua PHDI Kabupaten Tabanan.




Drs. I WAYAN DJAPA
Drs. I MADE SAMBA

3). P.T. Kepala Kantor Departemen Agama Kabupaten Tabanan.



I GUSTI LANANG MUDITA, SH

MURDHANING PAMIKUKUH
BURAT TABANAN,




N. ADI WIRYATAMA, S. SOS

Mengetahui dan telah dicatatkan :

Tanggal : 23 Juli 2002
Reg.Nomor : 189/111/HK

Kepala Bagian Hukum
Setda Kabupaten Tabanan,



I.G.A. PUPU SUMARPATNI, SH

LEPIHAN : I
TETINASAN NIASA LAN SASANTI, DESA ADAT APIT YEH

- (1) Sibeh Bucu Lima, mateges : Desa Adat Apit Yeh mapikukuh antuk Pancasila. Dasar miwah Darsanan Jagat Republik Indonesia..
- (2) Swastika jeroning Padma Asta Dala :
 - ha. Swastika, mateges : Krama Desa Adat Apit Yeh, nyungkemin miwah nginggilang Agama Hindu.
 - na. Padma Asta Dala, mateges : Krama Desa Adat Apit Yeh, misinggihang Asta Aiswaryan Ida Sang Hyang Widhi, inggih punika : Anima, Laghima, Mahima, Prapti, Prakamya, Isitwa, Wasitwa, miwah Yatramawasayitwa. Tios ring punika, sajeroning ngupadi patitis Desa Adat Apit Yeh, Prajuru Desa Adat Apit Yeh, mapagamel antuk Asta Brata, inggih punika : Indra Brata, Surya Brata, Candra Brata, Yama Brata, Bayu Brata, Kuwera Brata, Agni Brata, maka miwah Baruna Brata.
- (3) Padi lan Kapas, mateges : sajeroning ngupadi jagaddhita sane matiti pangancan antuk Dharma, Artha, Kama, Krama Desa Adat Apit Yeh, tan mari nglimbakang bhoga miwah upabhoga utawi sandang pangan.
- (4) Ante kalih balung, mateges : Desa Adat Apit Yeh, kaepah dados kalih Banjar/ Tempekan, inggih punika : Banjar/Tempekan Dajan Telabah, miwah Banjar/ Tempekan Delod Telabah.
- (5) Gunung, inggih punika : Gunung Batukaru, riartukan Desa Adat Apit Yeh, magenah ring sampih kelod Gunung Batukaru.
- (6) Padma, mateges : sajeroning kahuripane sarahina-rahina, Krama Desa Adat Apit Yeh, tan mari ngamangehang sraddha bhakti, majeng ring ida Sang Hyang Widhi.
- (7) Undag mapalih pat, mateges : sajeroning nganampekang sikian ring Ida Sang Hyang Widhi, wenten petang pamargi sane kawstanin Catur Marga, inggih punika: Bhakti Marga, Karma Marga, Jnyana Marga, miwah Rajayoga.
- (8) Candi Bentar, mateges : sajeroning ngupadi patitis Desa Adat Apit Yeh, Krama Desa Adat Apit Yeh, tan mari ngamangehang Tata Krama, minakadi Tata Sukerta, inggih punika : Sukertan Tata Pakraman, Sukertan Tata Agama, miwah Sukertan Tata Pawongan.
- (9) Sasanti : Thani Sakanikang Praja, mateges : sane dados saka utawi adegan Desa Adat Apit Yeh, boya wenten tiyos, wantah upon-upon pabianan druwen sowang-sowang Krama Desa Adat Apit Yeh.

LEPIHAN : II
PANITIA PERUMUS LAN PANYURATAN AWIG-AWIG
DESA ADAT APIT YEH

Penasehat : Anak Agung Made Subagia.
Ketua : I Gusti Wayan Pakeg.
Wakil Ketua : I Gusti Ketut Widastra.
Sekretaris : I Gusti Nyoman Puspawan.
Anggota : 1. I Wayan Mender.
2. I Gusti Made Sarka.
3. I Wayan Muliarta.
4. I Wayan Suatin.
5. A A. Putu Widiadnya.
6. I Ketut Sukarnawa.
7. I Ketut Tri Wijana.